

NO. SOALAN: 57

**PEMBERITAHUAN PERTANYAAN BAGI JAWAB LISAN
DEWAN RAKYAT**

PERTANYAAN : LISAN

**DARIPADA : DATO' DR. SHAMSUL ANUAR BIN HAJI
NASARAH**

TARIKH : 2 OGOS 2017

RUJUKAN : 10014

SOALAN:

Dato' Dr. Shamsul Anuar Bin Haji Nasarah [Lenggong] minta MENTERI DALAM NEGERI menyatakan apakah perancangan Kementerian dalam menambah kapasiti pusat tahanan imigresen sedia ada yang memuatkan sebanyak 36,300 pesalah imigresen berbanding 1.1 juta pendatang asing tanpa izin yang gagal mendapatkan Enforcement Card (E-Kad) bagi mengelakkan depot tahanan mengalami kesesakan teruk.

JAWAPAN:

Tuan Yang di-Pertua,

Untuk makluman Dewan Yang Mulia ini, Program E-Kad Sementara Pekerja Asing merupakan inisiatif Kerajaan untuk memberi peluang kepada Pendatang Asing Tanpa Izin (PATI) tanpa dokumen perjalanan yang sah dan bekerja secara haram di Malaysia diberikan kad kebenaran bekerja sementara bagi memenuhi sektor formal yang dibenarkan.

Program ini turut dirangka bagi memenuhi permintaan majikan untuk mengisi keperluan tenaga kerja di sektor pekerjaan yang dibenarkan sahaja serta membolehkan Kerajaan mengetahui jumlah PATI dalam negara bagi tujuan pemantauan serta memenuhi keperluan senario keselamatan semasa. Dalam program E-Kad Sementara Pekerja Asing ini, Majikan dan PATI yang telah didaftarkan seterusnya perlu mendapatkan dokumen perjalanan (Pasport) daripada pihak kedutaan negara PATI yang berkenaan bagi membolehkan PATI tersebut diputihkan melalui program ini.

Antara syarat-syarat utama bagi permohonan E-Kad Sementara Pekerja Asing adalah seperti berikut:

- i) PATI harus mempunyai Majikan;

- ii) PATI harus bebas daripada sebarang rekod jenayah;
- iii) PATI diwajibkan lulus pemeriksaan kesihatan; dan
- iv) PATI tidak tersenarai dalam Senarai Syak.

Manakala syarat-syarat kelayakan pihak Majikan pula adalah seperti berikut:

- i) syarat-syarat Majikan di bawah Program *Rehiring* dikekalkan;
- ii) tersenarai di bawah sektor dan sub-sektor yang dibenarkan sahaja;
- iii) tidak tersenarai dalam senarai majikan yang digantung urusanniaga oleh *One Stop Centre (OSC)*, Kementerian Dalam Negeri;
- iv) tidak disenarai dalam Senarai Hitam / Senarai Syak;
- v) perlu mematuhi syarat pengambilan Pekerja asing yang ditetapkan oleh OSC, Kementerian Dalam Negeri (KDN); dan
- vi) PATI yang telah mendaftar dengan Program *Rehiring* tidak dibenarkan bertukar majikan.

Bermula pada 1 Julai 2017, JIM telah melancarkan Operasi Penguatkuasaan secara besar-besaran (OPS Mega) bagi memburu pihak majikan dan PATI yang degil dan ingkar untuk mematuhi undang-undang dan peraturan di negara ini. Operasi penguatkuasaan ini dijalankan secara berterusan tanpa henti dan pihak majikan serta PATI yang ditangkap dalam operasi akan dikenakan tindakan yang tegas.

Melalui pelaksanaan Ops Mega, bermula 1 Julai sehingga 24 Julai 2017, sebanyak 1,066 buah premis dan seramai 14,585 orang telah diperiksa. Daripada jumlah tersebut, seramai 4,576 orang PATI telah ditahan atas pelbagai kesalahan Imigresen seperti tiada dokumen pengenalan diri, tinggal lebih masa, salah guna pas. Pada masa yang sama, majikan juga turut ditahan atas kesalahan menggaji dan melindungi PATI.

Menyentuh isu 1.5 juta pekerja asing warganegara Bangladesh yang dibangkitkan oleh YB Permatang Pauh, Kerajaan ingin menegaskan bahawa angka ini bukanlah angka yang mutlak. Jumlah 1.5 juta pekerja asing yang sering diperkatakan ini adalah merujuk kepada jumlah warganegara Bangladesh yang berdaftar dengan pihak Kerajaan mereka untuk bekerja di luar negara, malah bukan merujuk kepada jumlah pekerja yang akan masuk dan bekerja di Malaysia. Jumlah sebenar kemasukan pekerja Bangladesh adalah bergantung kepada keperluan sebenar majikan semasa permohonan dibuat dan akan dinilai berdasarkan kelayakan serta kemampuan setiap majikan untuk mematuhi syarat dan peraturan yang ditetapkan oleh pihak Kerajaan seperti memberi keutamaan ruang dan peluang pekerjaan kepada rakyat tempatan terlebih dahulu.

Majikan turut mempunyai pilihan untuk mengambil pekerja asing daripada negara sumber selain daripada Bangladesh seperti Indonesia, Nepal, Myanmar dan lain-lain. Permohonan pengambilan pekerja asing juga telah diperkemaskan melalui penggunaan sistem atas talian untuk memudahkan proses permohonan oleh majikan dan mengelakkan

penglibatan orang tengah atau pihak ketiga serta langkah untuk membendung kes-kes pemerdagangan orang berlaku.

Bagi memastikan aspek keselamatan negara sentiasa dipantau, penyemakan identiti warga asing di pintu masuk negara dibuat melalui Sistem Pangkalan Data (Biometrik) Warga Asing dan Sistem Sekuriti Nasional (NERS) yang berupaya meningkatkan keberkesanan kawalan dan pemeriksaan warga asing dengan membuat proses pengecaman terhadap data biometrik yang telah direkodkan sebagai Senarai Syak. Di samping itu, NERS juga dapat mengenal pasti ketulenan identiti individu berdasarkan semakan silang dengan maklumat biometrik yang terkandung dalam pangkalan data NERS.